

Schnitzel PUNK

2025

*Alles isch fang digital, Papier bruchts niana meh.
Zum Bischpiel kasch fascht niamert meh mit Bargäld zahla gseh.
Schiissi-Papier isch bald no ds Letscht wo analog isch.
Das isch und blibt anal und gopfnomol au logisch.*



*Miar händ scho gära Blau, zum Bischpiil blaua Himmel
und uffem Gorgonzola sogar au blaua Schimmel.
Doch das huara Gschrei, jo herrgotsappermoscht,
goht üs uf da Sack, wäg dära huara blaua Poscht.*



*Ma sait, miar Schwiizer segen so humanitär
und glich tüand miar mit Lüt in Not üs as bitzli schwär.
Als Flüchtling bisch do knapp geduldet, läschtig und an Tschutsch,
usserd kunnsch vo Brienz und bisch gflocha wägma Rutsch.*



*Um da Röschtigraba isch scho lang as huara Gschiss.
Und dr neu Umweltminischerter isch au as Ärgernis.
Miar hettend do a Lösig für a Bitzali meh Ruah:
Dr Röschti in da Graba und dänn dä Graba zua.*



*Wölf oder Lüchs, Rinder oder Schwii,
wägma bitz verwächsla, kasch doch nit so sii.
Hauptsach vo dänä Viecher sind wieder drei awägg
und heimlich hät dr Mohamed jo gliich au gära Späck.*



*D 500-Johr-Graubünda-Fiir, a riisa huara Wälla,
miar händ zwor gar nüt gmärkt, aber wüssends vom Verzella.
Oh nai, halt, verwechslet! S muas öpis anders si.
Ach jo, das wo miar ghört händ, isch d Velobörse gsi.*



*Läckmer d Katz am Arsch, törf ma nümma säga.
Das würdi sich mim Tiarschutz gar nit guat verträga.
Und wens das Tiarli miach, nur mol agnoh falls,
hetti ma, wenn das uuskunnt, no an Prozess am Hals.
Miar händ üs gfrogt, warum das sötti Missbruuch sii.
Wens so richtig fischelet, wär d Katz doch voll drbi.*



*Nur jo haisst jo, das sött ma langsam wüssa.
Und zwor au scho im Alltag, nid nur bim Sex und Küssa.
As brucht ganz klari Zaicha, susch bliibt ma aifach stur.
Das giltet au ar Halteschtell fürd Bus-Schofför vu Chur.*

*Pro Juventute heisst bi üs Pro Junior.
Das kunnt üs gendermässig a bizli gspässig vor.
Politisch ganz korrekt isch das ganz sicher nitta.
Fascht so schlimm, wia wemma saiti, s haisst jetzt Pro Juventitta.*



*Für da Schärbahuufa zBärn wod Amherd hinterloht,
brüchtis jetzt a Supperkraft als nöia Bundesrot,
kai Mischtschtockkomandant – und kai Reserve-Pfischter.
Was üs vorschwebt isch Nemo als Verteidigungsminischerter.*



*Jurovischen Song Contescht – git as huara Fescht.
Viel hochi Gäscht wirsch gseh – nur kai vur EVP.
Au d SVP hät bockt – usser villicht dr Vogt.
Jetzt sind miar alli gspannt, wia Basel dia bunti Buda rockt.
Genderstern hämmer gern, Nonbinärli au.
Dräqueen Märlichtunda, schtört doch ächt kai Sau.
Switzerland Zero Point, das isch frühahner gsi.
Jetzt sind miar an dr Queera-Front zvorderscht mit drbii.*



*Maloders, Tischiartscha, Haldastai... Miar witterend an Plan.
Sicher gohts no witer mit däm Churer Grössawahn*

*Fürs Bigair wäri endlich an gschida Ort bereit,
nachdem miar fusioniart händ mit dr Lenzerheid.*

*Trimmis würd, das isch kai Frog, au zimlich schnäll iknicka.
Das wär a guati Glägaheit, dr Hug ind Wüaschti z schicka.*

*Ganz dringend müasst ma Untervaz grad sofort annektiara,
dass dia dr Fasnachtsumzug z Chur nüm könd konkurrenziaara.*

*Taminser wärend au bald fällig, wia dr Ochs am Bärn.
Dia wüssen sicher nüm rächt wiiter ohni Gartazwärg.*

*Brienz und Felsberg könnt ma dänn grad zämme überneh.
In Zuakunft rutschts und polterets döt ainawäg no meh.*

*D Emser hättend huara Freud, wenn sie zu Chur biträttendi,
will sie dänn endlich au amol a schlau Fasnacht hättendi.*

*Bliibt no Z wia Zizers und Züri villicht au.
Aber simmer doch mol ehrlich, döt häts aifach zviel Stau.*

*Aina für alli, alli für aina
Verschwindet a Gmeind, dänn kümmerets kaina
Jedi Fusion isch an Schritt uf dr Spur
Vo da Imperialischta im Stadrot vo Chur
Aimol kunnt jeda dra uf dära Shoppingtour.
Trotzdem wird dia Welt nid untergoh,
sie heisst dänn aifach «Chur».*